

Kalaallisut ilitsoqqussaralugu A - 2022

1. Atuartitsissutip inissisimanera

Atuartitsissutip pingarnertut sammisarivai kalaallisut oqaatsit atuakkiaateqarnerlu. Kalaallisut atuartitsinermi kalaallisut allatanik ilisimasaqarneq misissuinerlu inuiaqatigiinni nunarsuarmioqatigiinnullu naleqqiussilluni pissaaq. Kalaallisut allatanik misissuinkut ilaatiqullu pilersitsinikkut atuakkialerinikkut, oqaasilerinikkut tusagassiuutlerinikkullu Kalaallit Nunaanni nunarsuullu sinnerani kulturikkut paasinnittaatsitigullu paasisaqarfinginissaat oqaluttuatoqqaniit nalerput angullugu siunertaavoq. Sukumiisumik allaaserisanik atuarnikkut, oqaatsitigut, oqaluttuarisaanikkut, kusanartulioriaatsimiillu isigalugu misigisaqarneq, misissuinkut immikkoortiterisinnaaneq isummersuiffiginninnerlu ataatsimoortinnejalissapput. Atuartitsissutip pilersitsinertaani atuartut oqaatiginnissinnaassusaat paasissutissanillu ingerlatseqqissinnaassusaat ineriartortinnejassapput, allaaserinninnikkullu naqitanik misissuineq atassuserneqassalluni. Naqitanik misissueqqissaarnermi paasinneriaaseq pilersitsisinnaassuserlu ataqatigiissinneqassapput.

2. Atuartitsissutip siunertaa

Ilisimasassat piginnaasassallu

Kalaallisut atuartitsineq qaammaassaqarnissamik ilinniaqqinnissamullu piareersarnermik siunertaqarpoq. Atuartut allatanik qanganisaanerusunik nutaanerusunillu suliaqarnikkut misissuinkut isummersinnaassusaat nunarsuarmut imminnullu naleqqiussisinnaassusaat ineriartortinnejassaaq. Atuakkialerinerup, oqaasilerinerup tusagassiuutlerinerullu ataatsimoortinnerisigut atuartut qaammassaqarnerulissapput, pilersitsisinnaassusaat, nutaaliorsinnaassusaat paasissutissarsiornermilu paasissutissanik atuisinnaassusaat nalilersuisinnaassusaallu inerisarnejassalluni. Atuartut oqaatiginnissinnaassusaasa ineriartinnerani qitiussaaq patajaatsumik oqaatsinik atuineq paasissutissanillu ingerlatitseqqiiuarneq. Patajaatsumik oqaatiginnissinnaanerup paasissutissarsiornermilu nalilersuisinnaassuseqarnerup atuartut inuiaqatigiinni nutaaliasuni, tamat oqartussaaqataaffianni, nunarsuarmioqataaffiusumi innuttaaqataasutut namminneerlutik paasisassarsiorlutilu iliuuseqarsinnaanngussapput.

Ilikkagassatut suleriutsinillu piginnaasassat

Atuartut kalaallisut atuartitsinermut tunngasunik misissueqqissaarsinnaassapput, isumasiuisinnaassallutik naliliisinnaassallutillu, paasissutissallu passussinnaanngussavaat, oqaatsit isumaat allanngorarsinnaanerilu nassuitsumik paasisinnaassallugit, imarisat allanngorarsinnaanerilu paasisinnaassallugit. Atuartut kalaallisut atuartitsinermi piginnaasassaat qaammaassaqalernissamut ilinniaqqinnissamullu piareersarnermut siunertaqarpoq.

Inuttut inooqataanermillu piginnaasassat

Kusanartulioriaatsinut eqqumaffiginninneq, oqaatsitigut isumaliutersorneq oqaatsinillu atuilluarnerup, aamma naqitanik allaqqaarneqarnerminni piffissami nunamilu sumiinnermi assigjiingisitaartuni passussisinnaanerup, atuartup imminut avatangiisiminullu paasinninnerata ineriartorneranut tapertaassapput. Taakku tunngavigalugit atuartut pingaaruteqartumik inuttut kinaassutsimik paasinninnissamut tunngavissinneqassapput,

taamalu aamma inuttut namminermut peqateqarlunilu saqqumilaarsinnaanngorneranut tunngavissinneqassallutik.

Kulturikkut inuiaqatigiittullu piginnaasassat

Atuartut sammisanut tunngasutigut namminneerlutik inuiaqatigiinni nunarsuarmilu pisunut isummersorsinnaanissamut iliuuseqarsinnaanissamullu tunngavissinneqassapput.

Tassuunakkullu atuartut pissutsinik paasisimasaqalissapput iliuuseqarsinnaanngussallutilu Kalaallit Nunaanni inuunermi nutaalialasumi, tamat oqartussaaqataaffianni nunarsuarmioqataaffiusumilu nalilersuisinnaanikkut oqaatsinillu nakimaatsumik atuilluarnikkut.

3. Ilikkagassatut anguniagassat imarisaalu

3.1 Ilikkagassatut anguniagassat

Atuartut piginnaasaqarfigilissavaat:

- a) oqalunnikkut allattariarsornikkullu eqqortumik, allanngorartumik namminiussuseqartumillu saqqummiussisinnaaneq,
- b) oqalunnikkut allannikkullu malittarissanik nalunngisaqarnermik ersersitsisinnaaneq, ilanggullugu allaatsimi malittarisat eqqortumik oqaasiliornermut atorsinnaanerinik sapersaateqannginnej,
- c) oqaatsit atuuffiinik allanngorartuunerannillu nalunngisaqarnermik taakkualu kulturimut inuiaqatigiinnullu atuummassuteqarneri
- d) oqaluttariarsorluni saqqummeeriaatsit paasinartuliorluni atorsinnaallugit (ilaallutik sammisamut tunngasunik saqqummiussisinnaaneq, isummersornermut tunngavilersuisinnaaneq)
- e) allattariarsorluni saqqummeeriaatsit paasinartuliorluni atorsinnaallugit (ilaallutik erseqqissaaneq, isumaliutersoneq, misissueqqissaarneq, isumasiuineq naliliinerlu),
- f) sumiluunniit naqitanik takorluukkianik takorluukkiaanngitsunillu misissueqqissaarneq, isumasiuineq naleqqiussinnaallugit,
- g) kalaallisut atuakkiat ukiut ingerlanerini pingaaruteqarnerusut nalunngisarilluarnerinik ersersitsineq, nunarsuullu sinnerani atuakkianut naleqqiussinnaallugit,
- h) kalaallisut atuakkiat oqaluttuassartaannik nalunngisaqarnermik, taakkulu kulturikkut inuiaqatigiinnullu attuummassuteqarnerannik takutitsisinnaaneq,
- i) nalitsinni tusagassiuuteqarnerup ilisimasaqarfigalulu isumaliutigisinnaanera
- j) atuartitsissutip suuneranik periaasianillu ilisimasaqarlunilu isumaliutiginnissinnaassuseqarneq
- k) naqitani elektroniskinilu naqitat assilissallu ataqatigiissusaannik atuaasinnaaneq aamma
- l) qarasaasiakkut saqqummikkanik ujarlersinnaaneq kiisalu aallersinnaaneq, immikkoortiterisinnaaneq, atortussianillu naqitanik qarasaasiakkoortunillu atuisinnaaneq.

3.2. Pingaernerutillugit pisassat

Pingaernerutillugit pisassat aqqutigalugit atuartut itisiliineq ilisimasaqarnerlu anguniassavaat. Pingaernerutillugit pisassat tassaapput kalaallisut naqitat. Pingaernerutillugit pisassat

atukkialerinikkut oqaasilerinikkut tusagassialerinikkullu naleqqersorneqassapput 2:1:1-mik. Pingaernerutillugit pisassat immikkoortui pingasuusut atuartitsinermi ataqtigisilluarneqassapput, aamma ingerlatani ataasiakkaani. Saqqummersitamik atuarneq naqitamik killilikamik itisiliinissamut periarfissiissaq.

Pingaernerutillugit pisassat tassaapput:

Oqaatsinut tunngasunik pisassat

Matumani naqitat assigiinngiaartut oqaatsinik misissueqqissaarluni sammineqassapput, ilaatigut atuakkiatut allatat, allatat tunngavilersortut oqalugiaatillu. Sammineqassapput

- oqaatsinik misissueqqissaarneq, isumasiuineq naliliinerlu
- oqaloriaatsimik misissueqqissaarneq, ilaallutik attaveqatigiinnermi pisut, saaffiginneriaatsit tunngavilersuinerillu.

Atuakkialerinermut tunngasunik pisassat

Matumani oqaluttuarisaarnermi atuakkiaatit assigiinngisitaartut, atuakkialerinermi misissueqqissaarneq najoqqutaralugu misissorneqassapput. Naqitat tassaassapput kalaallisut allatat. Naqitat atuakkiaateqarnikkut, kulturikkut qaammaassaqarnikkullu naleqqiussilluni atuarneqassapput.

- a) naqitat 1900 sioqqullugu allatat, matumanilu ilaassapput, oqaluttuat oqaluttuatoqqallu
- b) naqitat 1900 – 1950 tikillugu
- c) naqitat 1950 – 1975 tikillugu
- d) 1975-ip kingorna naqitat, matumanilu ilaassapput, ukiuni kingullerni tallimani saqqummiussat
- e) naqitat, nunani allamiut atuakkiaat kalaallisunngortitat, taakkulu kalaallit atuakkiaannut sunniutigisinnaasaat.
- f) minnerpaamik *suliat sisamat* (4 værker) allaaserinneriaatsini, takisuuliaq (roman), isiginnaagassiaq (drama), naatsukullalit ataatsimut katersat (novellesamling), kiisalu taalliat katersat (digtsamling), tamatumanilu minnerpaamik ataaseq piffissaliinermi 1950-ip siornatigut allataq, minnerpaamik ataaseq piffissami 2000-ip kingorna allataq. Suliat (værket) allaaserinneriaatsini assigiinngitsuusuni minnerpaamik marluk ilaatineqassapput. Taakku saniatigut sammisaqarnermut atatillugu atuagaq ataaseq namminersuutigalugu atuartumit toqqagaq ilinniartitsisumillu akuerisaq, atuarneqassaaq; atuagaq atuarneqartoq atuartumit oqalunnikkut allannikkulluunniit saqqummiunneqassaaq,
- g) 2000 sioqqullugu *piffissami aalajangersimasumi* saqqummersunik atuarneq.

Sammineqassapput:

- atuakkianik misissueqqissaarneq isumasiuinerlu
- atuakkialerinermi sakkut pingaeruteqartut atornissaat
- atuakkiaateqarnikkut, kulturikkut qaammaassaqarnikkullu naleqqiussineq
- naqitat pinngorartitsinikkut pilersitat.

Tusagassiuitut tunngasuni pisassat

Tusagassiuitlerinermi misissueqqissaarnikkut saqqummersartut assigiinngisitaartut sammineqassapput:

- h) nutaarsiassalerineq
- i) pisimasulersaarutilerineq

j) takorluukkersaarutilerineq

Matumani sammineqassapput:

- attaveqatigiinnermik misissueqqissaarneq
- tusagassiamik misissueqqissaarneq isumasiuinerlu
- tusagassiutit inooqatigiinni, kulturikkut oqaluttuarisaanikkullu atuuffiinik misissueqqissaarneq naliliinerlu

3.3 Illassutitut pisassat

Illassutitut pisassiutit pingarnerutillugit pisassat itisilerlugillu naleqqiussussavaat, atuartullu ilinniakkat tungaatigut annerusumik paasiaqalersillugit.

4. Atuartitsinerup piareersaasiornera

4.1 Atuartitseriaatsit

- a) Atuartitsinermi atuartup piginnaasai ilisimasaalu aallaaviussapput.
- b) Atuartitsineq aaqqissuunneqassaaq sapinngisamik oqaloqatigiinnikkut ilitsersuineq atorneqarluni.
- c) Atuartitsineq aaqqissuunneqassaaq atuartitseriaatsit allanngorartillugit.
- d) Atuartitsineq aaqqissuunneqassaaq atuartut soqtigisaat pisariaqartitaallu tunngavigalugit, taamaalillutik atuartut atuartitsissut pissanganartutut, tulluartutut susassaqarfittullu isigissammassuk.
- e) Atuartitsineq aaqqissuunneqassaaq sammisamut tunngatillugu ingerlatani tamani ineriaartorneqartillugu aamma oqaatsitigut taaguusersuutitigullu atuartut namminneerlutik suleriaatsinut sungiusarsinnaanngorlugit.
- f) Atuartitsineq aaqqissuunneqassaaq sapinngisamik inuiaqatigiinnut naleqqiussisinnaanissaq anguniarlugu.

Naqitanik misissueqqissaarneq aaqqissuussinermi qitiussaaq, tamatumani atuartut inooriaasiannit tunngaveqarluni itisiliinissaq naleqqiussinissarlu periarfissaalissammata. Atuakkialerineq, oqaasilerineq tusagassiutilerinerlu itisilerlugillu kattussuunneqassapput. Atuartut oqaluttariarsornikkut allattariarsornikkullu oqaatiginnissinnaanerat atuartitsinermi ingerlatassani ilaatinneqassapput, taamaalilluni atuartut ilikkagassanik itisiliutaa paasissutissanik ingerlatiseqqiineq sungiusarsinnaanngussammassuk. Taamaaliornikkuttaaq atuartut sammisamut tunngasunik ilikkariartorerat qaammaassaqaleriartoqqinnerallu ikorfartorneqassaaq. Atuartut atuartitsissutissanik pilersaarusiornermi peqataatittuarneqassapput, soorlu saqqummersitamik toqqaanerni.

Atuartut oqaatiginnissinnaassusaasa ineriaartortinneranni pingartinneqassaaq isummersinnaanerisa pilersitsilluni allannikkut sungiusarnermi inerisarnissaat, ilaatigut ilinniaqqinnissamut piukkunnarsarluni suliatigut oqaluttariarsorluni, allattariarsorluni allatigullu piginnaanngorsarneratigut.

4.2. Suleriaatsit

Atuartitsineq aaqqissuunneqassaaq allanngorartumik ineriaartuaartumillu. Atuartitsinermi allanngorartitsineqassaaq, ilinniartitsisoq qitiulluni aammalu atuartut qitiuttarlugit, ilinniartitsisup saqqummiinera, kisimiilluni suliaqarneq, atuartut saqqummiussinerat, atuartut ataatsimut atuartinneri, eqimattakkaarluni sulinerit internettikkullu aaqqissuussaasunik

sulinerit, pilersaarusiørerani ineriertuaartitsineq ukiuni pingasuusuni ersarissuussaaq, aammalutiviusut (atukkat, pissutsit) aallaavigalugit atuagarsorninngortitsineq kiisalu atuagarsorneq aallaavigalugu pissutsinut iserneq (induktive og diduktive principper) sinnerseraallugit atorneqartassapput.

Oqaatsinut tunngasunik sammisaqarnerit, atuakkialerinermut tunngasunik sammisaqarnerit, tusagassiuutinut tunngasunik sammisaqarnerit kiisalu allattariarsornerit nuiullugit atuartitsinerni ingerlanniarneqartassapput, soorluttaaq aamma atuakkialerigaanni atuakkiaatit oqaluttuassartaannut inissinniarneqartassasut.

Naqitanik misissueqqissaarneq itisiliisoq naleqqersuisorlu atuartitsinermi qitiuvoq, atuartullu ataasiakkaat isumasiuisinnaanerannik atuaqatigiillu oqaloqatigiinnerannik oqallinnissamillu periarfissiisaaq. Atuartitsinerup ilagissavaa sammisamut tunngatillugu apeqqusersuineq, misissuineq, ineriertortitsineq inerniliussanillu nalilersuineq. Misissuinermut atatillugu oqaatiginnissinnaanerup inerisarnerani atuartitsinerup nalaani annertunngikkaluanik allalluni pilersitsinermik sammisaqartoqarsinnaavoq, ataatsimoorluni paassisutissanik ingerlatitseqqiineq, ilikkagassatut anguniagassat ilaannik sungiusarnerit kiisalu suussutsinut tunngasunut annertunerusunut tunngassutilinnut ataqatigiissumik, paassisutissanillu ingerlatitseqqiilluni suussutsini saqqummeriaatsimut tulluartunik naqitanik sammisamilluunniit misissuinermi. Suliaqarnerup nalaani siunnersuineq pingartinneqassaaq. Allaaserisassanik oqaluttariarsorlunilu sammisanik aaqqissuussinermi atuartut oqaatiginnissinnaassuseqarnerat qitiutinneqassaaq. Ingerlatassat aaqqissuunneqassapput oqaluttariarsorneq allattariarsornerlu atuartitsinermut ilaasussangorlugit. Atuartut tunngaviusumik taaguutinik sakkussanillu naqitanut assigiinngitsunut suliaqarnissamut atugassanik ilinniartinneqassapput.

Allalluni suliaqarneq

Allalluni suliaqarnerup ilagai annertunngitsunik allalluni anguniagassat ilaannik sungiusarnerit killilikamillu allannerit. Aamma allaaserisanik annertunerusunik allattoqassaaq, tassani atuartut ataqatigiissumik naqitamut sammisamilluunniit misissueqqissaassapput isumaliutorsorluttillu.

Allalluni suliaqarneq tassaavoq allalluni saqqummiineq. Ukumi siullermi allannermut tunngasunik atuartitsinissat ataatsimoortillugit peqqissaartumik tunngaviusumik begrebit ineriertortitsillunilu allannermut misilitakkat ilitsersuussutigineqassapput. Ilitsersuussineq nalunaaquttap akunnerini 10-15-ni sivisussuseqassaaq. Allalluni suliat ukiut pingasut ingerlaneranni 22-nit 26-nut amerlassuseqassapput, soraarummeerutinut nalunaaquttap akunnerini arfinilinni suliaasartunut assingusuussallutik.

Tunngaviliilluni atuarfiusumi taaguutit periutsillu tunngaviusut ineriertortitsilluni allaaserinninnermut tunngasut ilinniartitsissutigineqassapput.

4.3 It

Atuartitsinermi It-p ilaatinisaa makkunani pingaaruteqarpoq:

- allannermk ilinniartitsinermi aamma oqaluttariarsorluni saqqummiinermi kiisalu
- paassisutissanik ujartuinermi

Atuartut naqitalerinermi allaaserinninnermilu qarasaasiatigut sammisanut atuuffigisinaasaannullu misissueqqissaarsinnaanermik isornartorsiuisinnaanermik,

akisussaassuseqarnermik isumaliutiginnissinnaassuseqarnermillu ilinniassapput. Allaaserinninnermi oqaluttariarsornermilu suliaqarnermi sulianik paasinarsaasinnaanermut, ilaatigullu pinngorartitsilluni nutaaliorlunilu inerniliisinnaanermut atatillugu atuartut It atorsinnaalissavaat. Atuartut qarasaasianik atuisarnertik ineriertortillugulu isumaliutigisinnaalissavaat inuiaqatigiinnilu nutaalialiasuni, tamat oqartussaaqataaffianni, nunarsuarmioqataaffiusumi innuttaaqataasutut namminneerlutik paasisassarsiorlutilu iliuuseqarsinnaanngussapput.

4.4. Oqariartaatsit suliamut tunngasut

Atuartitsineq piareersaasiorneqassaaq aaqqissuussaasumik ilinniartut oqariartaasii suliamut tunngasut ineriertortillugit aammalu atuartitsissutip taaguusersuutanik paasinninneq atuisinnaanerlu ineriertortillugit. Atuartitsineq piareersaasiorneqassaaq atuartut patajaatsumik oqaatsnik begrebinillu paasinnillutilu atuisinnaanngorsarlugit.

4.5 Atuartitsissutinut allanut attuumassuteqarnera

Kalaallisut atuartitsineq nalinginnaasumik atuartitsissutinut allanut attuumassuteqarpoq. Atuartitsissutip fagit allat peqatigissavai, inuttut pissuseqarnermut tunngasut kusanartulerinernullu (æstetisk) naliliisinnaanermut naleqqersuisut. Atuartitsissutit allat oqaatsnik sammisaqarfiusut ataatsimoorussamik oqaatsinut naqitanullu tunngasunik taaguusersuineq pillugu suleqatigineqarsinnaapput.

Kalaallisut atuartitsinerup ingammik danskisut atuartitsineq naqitanik misissueqqissaarnermi equeersaataasunillu sammisaqarnermi suleqatigisinnaavaa. Ukiut pingasut ingerlanerini minnerpaamik nalunaaquutap akunnerini 30-ni ingerlaqatigiilluni atuartitsisoqassaaq, tassani atuartitsissutit kalaallisut qallunaatullu ingerlatseqatigiissallutik.

5. Naliliineq

5.1 1ngerlaavartumik naliliineq

Atuartitsinerup ingerlanerani ingerlaavartumik naliliisoqartassaaq tassuunakkut atuartup ilikkagassatigut ineriertornera ineriantoqqinnissamullu qiterisassaq ilinniartitsisumut atuartumullu ilisimaareqqullugu. Atuartup oqaatiginnissinnaaneranut nalileeriaatsit assigiinngitsut atorneqassapput, ilaatigut makkua:

- ineriertortsilluni allanneq, ilaallutik tunniusseqqinneaq
- allattariarsorluni ilitsersuineq elektronisk portfolio atorlugu, tassani atuartup allaqqaagaa oqaasertalerlugu utertinneqassaaq kiisalu allataq naammassisaaq
- oqaluttariarsorluni saqqummiinerit oqaaseqarfigineqartassapput.

5.2 Misilitsissutit ilusissaat

Allattariarsorluni misilitsinnejq ataaseq, oqalullunilu misilitsinnejq ataaseq ingerlanneqassapput.

Allattariarsorluni misilitsinnejq

Allattariarsorluni misilitsinnejq qitiusoqarfimmit soraarummeerusanit tunngaveqassaaq. Misilitsinnejq akunnernik arfinilinnik sivisussuseqarpoq. Misilitsittussaq suliassiissutit arlariit naqitanik imallit akornannit toqqaassaaq. Siullermik akunnerup aappaa avillugu eqimattakkaarluni suliassiissutinik sulisoqassaaq, eqqaamaniutissanillu

allattuisoqarsinnaalluni. Kingornatigut misilitsittup suliassiissut kisimiilluni akissuteqarfingissavaa.

Oqaluttariarsornermi misilitsinneq

Soraarummeerneq minutsinik 30-it missaaniittunik soraarummeertumut ataatsimut sivisussuseqassaaq, minutsit 60-it piareersartoqassalluni.

Suliassiissutit soraarummeerutaasussat soraarummeersitsisumit toqqartorneqassapput, ilikkagassatullu anguniakkat pingarnertut pisassat ilassuititullu pisassat sapinngisamik imarissallugit. Suliakkiusiat agguataarneri atuakkialerinermut, oqaasilerinermut tusagassiuutilerinermillu tunngasut 2:1:1 naleqqersussavaat. Apeqqusiaq ataaseq amerlanerpaamik pingasoriarluni atuaqtigiikuutaani atorneqarsinnaavoq.

Suliakkiut atuartitsinermi ingerlassimasamit atuakkialerinermit, oqaasilerinermit tusagassiuutilerinermilluunniit imaqassaaq, aammali arlaannik tapertalerneqarsinnaalluni. Suliakkiut naqitamik ataatsimik arlariinnilluunniit aallaaveqassaaq, kiisalu soraarummeertup qanoq suleriuseqarnissaanik ilitsersuussinernik imaqassalluni. Naqitat annerpaamik arfineq-pingasunik qupperneqassapput 2400 naqinnerit akunnerilu ilangullugit, imaluunniit najoqqutaq annerpaamik minutini aqqaneq-marlunnisut takitigisoq. Najoqqutat pereersimasat pisimanngisallu najoqqutarineqarsinnaapput; najoqqutarli ataaseq pinngitsoorani pisimanngisaassaaq. Suliassaq najoqqutamit pisimanngisamit aallaaveqassaaq.

Soraarummeertoq minutini arfineq-pingasut qulillu akornanni sivisutigisumik oqalulluni saqqummiissaq. Soraarummeernerlu ingerlaqqissaq suliakkiut makissimasaq oqaloqatigiissutigalugu.

5.3. Naliliinissamut tunngavissat

Misilitsinnerup nalilersornera tassaassaaq, misilitsittup ilinniakkanut anguniagassanut aalajangikkat uuttuutitut atorlugit saqqummiussinnaanerai.

Allattariarsorluni misilitsinnermi isiginiagassaapput misilitsittup piginnaasai:

- a) allaaserinnillaqqissutsimi
- b) sammisamik suliarinninneq
- c) suliakkiummik naammassinninneq aammalu
- d) kalaallisut atuartitsissutinut tunngasunik periaatsinillu ilisimasaqassuseq

Oqaluttariarsorluni misilitsinnermi isiginiagassaapput misilitsittup piginnaasai:

- a) oqalulluni saqqummiineq
- b) suliakkiummik naammassinninneq erseqqissaanerlu aammalu
- c) kalaallisut atuartitsissutinut tunngasunik periaatsinillu ilisimasaqassuseq.

Misilitsinnerni taakkunani marlunni, oqaluttariarsornermi allattariarsornermilu, karakteeri ataaseq naliliissutigineqassaaq, soraarummeertup misilitsinnermini angusai ataatsimut isigalugit.